

Basegn da segirezza envers la libertad

Pled d'avertura da la sessiun da zercladur

■ (anr/fa) En 16 artitgels constituziunals èn fixads 15 dretgs da libertad che las Svizras ed ils Svizzers giaudan. En temps da terror e da moviments d'immigraziun èn quels dretgs a l'avis dal president dal cussegl grond sut squitsch.

Per il cumenzament da la sessiun dal cussegl grond s'ha il president, *Michael Pfäffli*, deditgà al tema libertad. En ses pled d'avertura ha'l numnà las differentas libertads ch'ils burgais da la Svizra giudian. Quels chattan ins en la Constituziun federala. Tranter quels èn il dretg da la vita e da la libertad persunala, la protecziun da la sfera privata, la libertad da cretta e conscienza, la libertad d'avair in'opiniun, la libertad da domicil, da sa reunir, la garanzia da la proprietad e la libertad economica. «Quests dretgs da libertad furman il fundament da nosa societad libra e dal sistem economic avert en Svizra», ha ditg il president dal parlament grischun. Alura ha'l menziunà in mument che mettia en dumonda questa societad libra, «la tema dal singul per sia atgna libertad fin schizunt sia vita». Pfäffli ha numnà duas raschuns per questa tema, dad ina vart ils acts da terror er en ils pajais vischins e da l'autra l'immigraziun illegala. La consequenza è tenor el che tant la politica sco er il singul espriman il giavisch per dapliras forzas da segirezza unifurmadas. «Quai è in giavisch senza dubi legitim, la preschientscha da dapliris policists augmenta il sentiment da segirezza subjectiv», ha ditg il president dal cussegl grond, «l'effect collateral è dentant che dapliris policists chaschunan era dapli controlla ed ina surveglianza dal singul pli e pli intensiva.» Uschia vegnia la libertad dal singul er pli ferm sut squitsch. L'urden liberal ed ils dretgs da libertad che sajan colliads nunseparablmain cun quel n'èn, sco ch'el ha ditg, «betg predestinads, mabain fitg fragils». Perquai èsi a ses avis dad esser pre-



Michael Pfäffli.

MAD

caut cun mesiras che limiteschan quests dretgs, «era causa il privel latent dad abus». I saja adina puspè da s'engaschar per l'urden liberal en Svizra e da mantener e proteger il grad da libertad existent en quest pajais. Pfäffli ha terminà ses pled d'avertura cun in citat da Benjamin Franklin: «Tgi che banduna la libertad per chattar segirezza vegn la finala a perder tuttas duas.»